



Sanctus Mauritius legionis Thebaidæ, quæ anno Christi trecentesimo propter ueram Christianæ fidei religionem, in Vallesia Heluetiorum martyrij coronam nacta est, dux fuit. Cum enim tempore Diocletiani & Maximiani Cæsarum multæ seditiones per Romanum Imperium orientur, præsertim uerò in Galliæ finibus, dum Amandus & Helianus præfecti rudem plebem ad arma concitarent, Senatus populusq; Romanus Maximianum Imperatorem cum instructo exercitu eo loci miserunt, ut huiusmodi tumultus compescerent. In eo exercitu erat quoq; Aegyptiaca legio ex urbe Thebaida cõgregata, quæ circiter 6666 milites cõtinebat. Illi enim reipub. Romanæ subditi, inobedientes in officio continere, & nequaquam pios persequi iussi fuerant. Cum itaque legio illa Christiana cum Cæsare alpes Pæninos transgressi Octodurum, quod hodie Martinach dicitur, peruenissent, statuerat Maximianus Cæsar idolis suis cum toto exercitu sacrificia offerre, ut feliciorẽ uictoriam acquirerent. Id cum Thebana legio sensisset, celeriter Agaunum uersus duodecim millibus passibus distantem locum profecti sunt, ne celebri huic Ethnicorum festo interesse cogentur, cum enim uerum Deum agnoscerent, idolorum cultum auersabantur. Itaque itinere fessi iuxta Vallesiorum Agaunum in planitie confederunt, Cæsaris aduentum expectantes.